



Opuštena, ali radna atmosfera na času francuskog jezika



Unutrašnjost škole



Dvorište škole



Detalj sa izleta u Zenicu



Kako je potpisana konvencija sa koledžom u Dijonu u razmjeni, školarci često putuju u ovaj francuski grad

Francuska škola CIFS Sarajevo

Francuski jezik nas sve spaja!

U ugodnom prirodnom okruženju, na adresi Paromlinska 66, smještena je Francuska škola CIFS Sarajevo, koju pohađaju djeca čak 29 različitih nacionalnosti

Napisala **Majda Balić**
Snimila **Majda Balić i AG**

Francuski jezik je ono što veže 230 učenika raspoređenih u 17 odjeljenja privatne Francuske škole CIFS Sarajevo, koja je prije nekoliko dana imala sedmicu otvorenih vrata, a počeo je i redovni upis za sve uzraste. Školu pohađaju djeca svih uzrasta: od jako male grupe (dvije i po godine) Male škole – *Ecole Maternelle*, do završne godine srednje škole – *Terminale*. Prostrana, tiha, svijetla i dobro opremljena školska zgrada izgrađena u austrougarskom stilu, odlična je osnova za podsticanje uspjeha.

Prema riječima direktorice škole Bojane Drinić, Francuska škola u Sarajevu postoji od 1998. godine i djeluje u saradnji sa asocijacijom Mission Laique Française, koja za cilj ima širenje francuskog jezika i kulture diljem svijeta, naročito putem osnivanja škola koje imaju svjetovni (nereligijski) i interkulturalni karakter. U ovoj obrazovnoj

oazi školu pohađaju djeca čak 29 nacionalnosti, što je fantastična prilika da od najranijeg doba slušaju o drugim kulturama, upoznaju običaje i predstave zemlju iz koje dolaze. Premda većina učenika Francuske međunarodne škole nisu Francuzi, polovina njih su zapravo bh. državljani kojima francuski nije maternji jezik, ipak je to jezik koji ih zajedno veže. Uz stručno domaće osoblje školovano po francuskom sistemu i dio osoblja koje je posuđeno iz Ministarstva obrazovanja Republike Francuske, vrata za upis djeci svih uzrasta otvorena su tokom cijele godine. Zanimljivo je da djeca pri upisu u Malu školu i djeca koja upisuju osnovnu školu od prvog do petog razreda ne moraju nužno znati francuski, ali je za školarce uzrasta šesti-deveti razred neophodno poznavanje A2 stepena francuskog jezika. Srednja škola je rezervirana isključivo za učenike koji završe devetogodišnju francusku školu ili neku drugu frankofonu školu, a direktorica s ponosom ističe da kraja devetog razreda svi školarci imaju B2 iz engleskog i francuskog jezika po evropskom standardu što je sasvim dovoljno za pristup bilo kojem univerzitetu. Srednja škola egzistira uz pomoć nacionalnog centra za učenje

na daljinu kojim upravlja Francusko ministarstvo obrazovanja i na kraju školovanja Francuska država izdaje diplome učenicima. "Škola je registrirana po francuskom planu i programu, te radimo u skladu sa propisima i planom i programom koji propisuje Ministarstvo obrazovanja Republike Francuske. Zadovoljavamo domaće zakone, te djeca koja su bh. državljani pohađaju i nacionalnu grupu predmeta prema planu i programu kantonalnog ministarstva obrazovanja", kaže Bojana Drinić.

Mala škola – Ecole Maternelle

Mala škola u francuskom obrazovnom sistemu nije klasični vrtić, jer prema francuskom sistemu, postoji jasno definiran plan i program prema kojem obrazovanje počinje u trećoj godini. Djeca u toj dobi uče kroz igru, od motorike, preko rituala, a do kraja tog dijela školovanja imaju precizno definirane kompetencije i znanja koje usvajaju. Pored jezičkih radionica, uz nastavu koja je na obaveznom francuskom, sva djeca imaju i časove BHS jezika. "Kolege koje vode francuski plan i program surađuju sa nastavnicama koji predaju BHS jezik u

svim oblastima. Od srednje grupe, dakle četvrte godine, uči se i engleski dva puta sedmično", naglašavaju u školi.

Radno vrijeme škole je podređeno djeci i roditeljskim rasporedima – nastava se odvija od 8:30 do 16:00 sati ponedjeljkom, utorkom i četvrtkom, a srijedom i petkom od 8:30 do 12:30. Djeca imaju pauzu za ručak i dopunske časove iz francuskog, ili rade zadaću, a postoje i redovne vannastavne aktivnosti. Razredi s manje od 20 učenika omogućuju efikasan rad i nadzor, a individualizirana pomoć nudi priliku svakom učeniku da napreduje prema vlastitim mogućnostima. U ponudi je i produženi boravak koji svakog dana traje od 7:30 do 17:30. Prevoz je organiziran školskim autobusima i prilagođen je potrebama polaznika škole na relacijama prema Ilidži, Breki, Starom Gradu... Sigurnosni je aspekt vrlo bitan osoblju ove škole pa postoje posebni propisi koji nalažu da u školu ne može ući niko ko nije ovlašten da preuzme dijete, niti bez najave.

Stoga, Francuska škola CIFS Sarajevo poziva sve zainteresirane u obilazak i upoznavanje, a detaljnije informacije o njenom radu možete dobiti na brojeve telefona 033 611 011 i 062 334 889, te potražiti na www.cifs.edu.ba ■

